



Poštovati Srebrenicu kroz pravdu, istinu i pomirenje je put za budućnost Bosne i Hercegovine

Prilikom 25. godišnjice genocida u Srebrenici, visoki predstavnik Valentin Inzko izrazio je zahvalnost Majkama Srebrenice, koje su učinile najviše u potrazi za istinom i pravdom. Među njima je i rahmetli Hatidža Mehmedović, koja je željela budućnost za nova pokoljenja zasnovanu na istini, pokajanju i oprost. "Majke Srebrenice zaslužuju naše divljenje i poštovanje," dodao je visoki predstavnik.

Inzko je iskoristio priliku da još jednom skrene pažnju na sramotnu praksu nekih javnih ličnosti koje uporno prekravaju istoriju i relativiziraju srebrenički genocid do te mjere da veličaju osuđene ratne zločince. "Jednostavno je neprihvatljivo u 21. stoljeću da se studentski dom, gdje se obrazuju buduća pokoljenja, nazove po osuđenom ratnom zločincu. Apeliram na političara koji je postavio spomen-ploču da je i ukloni, kao znak žaljenja."

"Kao što je sudija Agius jednom rekao, poricanje genocida i njegovo veličanje predstavljaju konačnu fazu genocida," naglasio je visoki predstavnik.

Također je podsjetio da su događaji koji su se odigrali u području Srebrenice 1995. godine dobro dokumentirani i istraženi, te da su i domaći i međunarodni sudovi utvrdili da je počinjen genocid. "Niko od njih nije optužio ni jedan narod, jer nema loših naroda. Ima samo loših osoba".

Govoreći o pomirenju, visoki predstavnik je još jednom uputio apel političarima da zakopaju ratne sjekire, da pronađu mudrost i hrabrost da povedu građane BiH u budućnost. "Nakon 25 godina, vrijeme je da se krene naprijed, da se prošlost ostavi istoričarima da se njome bave s poštovanjem te da se okrenemo sadašnjosti i budućnosti".

Srebrenica treba zauvijek da ostane "planetarno mjesto sjećanja", mjesto gdje govorimo "nikada više". "Srebrenica bi također mogla postati mjesto koje govori o snazi oprosta, mjesto koje pokazuje da cijelo čovječanstvo pobjeđuje kroz praštanje", zaključio je visoki predstavnik.

[Obraćanje visokog predstavnika Valentina Inzka u povodu 25. godišnjice srebreničkog genocida \(duža verzija\)](#)

[VIDEO: Poruka visokog predstavnika povodom 25. godišnjice genocida u Srebrenici \(kraća verzija\)](#)